

幾亭外書

幾亭外書卷三目錄

家載

小序

父兄實錄

治句遺蹟序

治句遺蹟四十一條

聽訟一

清積案二

不解犯于法司三

取逃犯于畱都四

保甲五

制吏書六

約差役七

不動鋪行八

落倉革除供應九

革條編收頭十

幾亭外書

卷三

家載

改民解爲官解十一

革軍匠書手逐年造冊十二

革匠班收頭十三 本理解軍十四

革社倉長十五

革預備倉斗級十六

特僉老人代解十七

催民充驛役迎送十八

安馬戶十九

處置社穀二十

比徵二十一

禁革兌頭二十二

革兌糧使用二十三

定納戶上糧規二十四

攤減田稅二十五
鹽法二十六

修學二十七

會課二十八

社學鄉約二十九

嚴城守三十

禁婦女行遊三十一

禁節令供送三十二

教民紡織三十三
安香客三十四

畱心養濟三十五
療民疾三十六

多
卷之三
三
恤罪人三十七

重耕牛之禁二十八

興復水利三十九 興梁成四十

簡飭公館器具四十一

蜀行記

以坦直了生死

木梳匣

遵袁職方書札

困學全得父師之力

去自喜之病

杜聯

丙寅夏書扇

又

戒揆兒

書畧兒扇

書從子似木扇

書從子日大扇

第四姪臨字目大說

祖塋記

安葬先公夢

擬葬先慈夢

拜先公墓歸途

拜先慈墓往來紀勝

生氣可見

評靖質處士自祭文後

又

評貞婦賦

又五條

評傷夭賦

評曹操劉裕論

評昭烈不取劉琮論

評武侯論

評南北論

評李忠定公論

評張浚論

評元論

評錢武肅王宗謹序

評家藏書總序

評庚申遇羅記

幾亭外書卷三目錄

終

幾亭外書卷三

家載

平湖 屠象美

嘉善 周丕顯 全閱

小序

親之所無不敢飾也其所有不敢忘也雖曰載一家之事非益於世則弗傳也

父兄實錄

先公諱于王字伯襄別號頽亭萬曆壬午舉於

鄉丙戌成進士授魏令拊循貧弱耘鉏豪強若亂法吏無所貸邑舊有戶九十人任供需公悉蠲之亡何以喪歸而九十人者相率斂贈却之已補授句容句故解役四十八條任之者家大氏破公酌其費以官吏代歲完中人產四十八家他煩役可息者悉汰去司倉以吏歲周而代無所得乾沒而穀貴穀賤平其價邑濱江旱潦易爲菑公修治隄防順助地理甚備晨夜孳孳大氏除疾苦勸農桑禁滛佚全安愚民而已事

詳治句遺蹟中、有盜矯稱、宗室子乘傳至郡邑謹遇以禮、公曰詐也、收案之、則偷竊不悛、又以劫敗者也、公之守正持重、發伏禁姦類此、當是時化大行、百姓親愛、獄訟衰止、盜賊還爲良民、去之日、老少攀車叩馬、千秋萬歲後、何時復見、吾公祠祀之、蓋公沒而聞者涕洟相望也、其父老稱爲句容良吏、徐公九經、丁公賓及公三人云、繇是公治狀最天下、尋遷刑部主事、公念少失恃、育於祖母丘疏、乞南便養得、旨改授

留工部虞衡司虞衡主。皇木故事行賄數千公嚴斥之。役立定。畱都益重。公城工屬公龍江稅并屬公。而閩使暨祿者。衡中旨出。且覆征龍江。張甚。公憤歎。請于司空。不卽應。公奮曰。此吾職也。移檄閩使曰。龍江稅。祖制若安得侵。今請於朝。若必稅。則罷本部稅。閩氣奪。答檄依違。公遂諭其使。業約詆監。不得重稅。假旨蠶漁。憲典從事。錯愕弗敢動。民賴以安。是時中人四出。漁商民辱。郡縣飛書。朝士緹騎夕逮。

公一紙騰示俯首聽命固見義憤發亦繇乘其未定先機奪之故也改南銓曹尋移疾歸而祖母丘不起躬含歟無憾云丁未始遷湖廣按察副使備兵武昌其歲大浸發數千金賑之全活者衆所部皆盜藪柯陳十二姓者尤武黠阻險不可迹公蒐練材官嚴賞罰責以盡力盜發輒得靡不畏死歛息矣公顧檄諭諸姓以自新諸姓歡幸曰此民等更生之辰也月餘縛四十餘人以獻魁宿靡遺公又爲處置善其後百年盜

患悉平。御史某用刑濫公匡之。御史恚。問公於郭文毅公。文毅曰。有爲有守。楚吏一人也。乃止。辛亥考三載績晉其省叅政癸丑遷四川按察使備兵建昌時賊夷方作或阻崔公曰國家有興臣子當計不反顧雖力疾其敢愛身遂行明年入蜀詢夷顛未知夷爲武弁誘殺其子報讐殺人遂以反聞公畧有成畫矣四月抵潼川而建昌業有主之者惟守上川南無人兩臺留公假攝公曰奉詔討夷苟就內地耶拂衣東歸疏

謝病乞骸骨進退皎然語在蜀行記乙卯卽家
起福建按察使主屯田鹽法水利 詔曰可而
公前數日歿矣公所在黔首霑惠慕思歌之魏
楚皆祠名宦其在句治績尤盛後二十餘年而
學憲臣過公庭訓從民望祠公移咨浙祠鄉賢
焉長子曰山毓字賁聞脩身閑戶好讀書爲文
章尤精於賦戊午舉浙江鄉試第一辛酉沒年
僅三十有八先是疾劇澹然如平時易簣前三
日爲文以自祭達生安命天下稱慕焉龍正私

謚曰靖質處士以謂淵明處改革之際韜其節顯處士將用未用抱其質質彰爲靖則同蓋其真也所謨著有文集六卷龍正釐次爲之序行於世周詩紀事詩摭詩考異各若干卷所裒緝古今賦畧若干卷藏於家

治句遺蹟序

先公方彊仕再爲令治句治益精去之日邑民陳寅輯政蹟四十一條傳播之余惟句之事不與他邑同則治句之法不盡通於治他邑然而

愛元元威胥阜興利除害約已豐下茲其意則無不通也威愛若何而濟興除若何而相安豐約若何而造茲其意則亦無不通也士之筮仕令爲多仕者之行其所學令爲親其足以佐親民之用於百一乎張善非先人意也廣善先人意也原記校而少文微潤色之庶幾行遠

聽訟一

每月放告三期每期僅准數紙干証代拘有不到者方令歇家催喚卽日問明輕者釋放重者

取供當堂面定罪名。有力無力聽其自認願息者卽從和息併紙免追各佐領不得受片詞蒞任四年餘衙役無一人敢下鄉者旣無勾攝又不久稽申冤理滯小民大悅或有倚恃人命扛屍搶擄則原被兩正其辜從來積棍打降悉訪確名姓如某某尤著按法問徒遣戍其餘不悛者一年後并其面貌皆熟識之每易名入公庭公輒笑曰汝又來笞之加等雷厲風行民又大畏。

清積案二

各上司數十年未了卷宗。其中有勢不能完者。有吏書留爲騙局者。公逐一簡出。親自清查。可完者嚴提歸結。難完者申請註銷。永塞吏書詐竇。數紀積案。三月而清。

不解犯于法司三

句邑素稱健訟。又逼近留都。棍徒動輒捏情越訴。法司陷害愚民。破家傾命。公摘誑告者數人。問擬軍徒。仍請撫臺朱公咨明法司槩不發解。

于是奸民計窮漸以安戢而京棍夥証夥騙之局亦不復行于茲邑矣

取逃犯于留都四

本縣刁棍往時與南京大猾交通遇有重犯卽潛往藏匿差人雖知踪跡奉牌入都大猾或推避不承或明言某衙門現有某事干連未經歸結其人不可發差人空手回白莫可誰何公知此弊沿習已深非嚴責差役所能了乃往見操院大京兆親白之皆立如公言嚴定約束自後

縣差持牌至京。如行境內擒取本縣逃犯。莫敢抗。公于法司提邑民。斷不發解。而邑民逃匿京邸。則必取之。兩者相須。杜奸行法。雖風裁力量。不畏疆禦。有大過人者。亦繇其清操英謨。足以感服上臺。故所請必從。所斷必行也。

保甲五

本縣多窮山僻壤。最易藏盜。公嚴行保甲之法。如一家爲盜。兩隣不舉。事發一體併究。又于城市鄉村編設甲長。二千一百十六名。練習武藝。

兼司盤詰有來歷不明者不許收畱潛住盜賊衰少又有一等良家子弟每因賭博蕩產殞身亦令保甲互相糾察容隱不舉與賭博同罪此又坊惡於未然者也故保甲之法行不惟彌盜且以防佚遊

制吏書六

各房科書手向用數十金買窩猶置酒席方得入門公至聽審悉出親斷書手捧牘侍立無敢出一詞取供時一字莫敢上下錢糧徵收給發

又不得那移侵剋。肅清坦易。百姓無求於房科。
於是此輩利少而多畏。在內者求退弗獲。在外
者寧束手無聊而不願進縣門一尺。其實公干
此輩未嘗作意苛求。不過稟白不行有犯必譴。
而已。衙門少得時吏書一人。民間受幾許寧靜
之福。

約差役七

皂快一人出名。每合白役三四人爲夥。凡奉差
遣分投撲捉。又或數人併至一家。挾詐酒食銀

卷三
錢公逐一查點正身令各畫小像于腰牌當堂驗。肖用印親押懸認聽用。每奉差至鄉只許正身一人。其無腰牌者百姓卽刻扭稟以白捕論。

不動鋪行人

鋪行雖屢奉前官禁革尚有光棍包頭索驅幫貼使用者公廉知悉行痛革如使客嘎程等項凡應用乾物預發紋銀與戶禮二房吏書往別境收買貯候取用時物隨市中平買衙內日用米薪蔬菜皆現銀平易有托名官價者卽許鋪

行扭稟重責。自是不動鋪行之名。始實見其政事。

落倉革除供應九

歲積倉在龍潭離縣七十里。每正堂臨倉驗米。區頭糧長歛衆供應酒饌費一科十公出禁毫。不許備自攜酒米菜肉至倉煮食。省及百金。

革條編收頭十

條編折色原點收頭一十七名。使用守候共費二千餘金。且有以一年之役而收支施累數年。

者又小民愚猾不同。愚者不諳書算。多致舛訛。
猾者侵欺官物。事敗問擬。此罔民也。而官亦何
利。公盡革之。立八櫃就見年糧長中。挨次輪八
名直管。止登數目。事完卽聽回家。雖應用簿籍
之微。皆官爲措辦。自是奸民無路侵牟。愚民不
至官署。而官物亦長足矣。

改民解爲官解十一

糧解原有四十八項。一年所費八千餘金。但僉
是役罔不傾家。蓋數百年于此矣。公至集鄉

民俞銳等。將錢糧逐項細酌。官民對語。宛若友朋。于是盡得其款要。量增水脚。責之官解。盡革民間各解頭。永著令甲。民樂生焉。

革軍匠書手逐年造冊十二

本縣二百一十六里。里有軍匠書手各一名。年以清理造冊爲名。科索里排稻麥。每里約費二十金。承襲已久。公悉罷之。追軍匠底冊入官收貯。待大造之年。量千條編內。派徵紙張工食。召人攢造。每年省四千餘金。甦民民德。祛奸奸不

敢。怨。又。本。縣。路。當。孔。道。迎。送。使。客。并。撫。院。守。門。
聽。事。官。吏。勢。不。可。缺。舊。有。義。民。應。役。後。以。軍。匠。
書。手。代。充。今。既。裁。革。不。當。勞。之。乃。議。報。曉。事。坊。
民。二。十。名。每。名。年。給。工。食。銀。六。兩。以。充。前。役。明。
派。于。民。者。僅。百。二。十。金。而。陰。省。三。十。餘。倍。公。意。
用。是。永。杜。軍。匠。書。手。貲。緣。求。復。之。端。其。舉。事。防。
微。不。肯。徑。情。又。如。此。也。

革匠班收頭十三

本縣匠班銀三百七十兩，常年另徵另收，收頭

既有使費守候之苦貧匠輸納者又苦于勾追
需索公議將各匠匠戶應納班銀于派徵糧銀
時各隨多寡就本匠排年名下隨糧帶徵革去
收頭一役皆立法簡便化有事爲無事久而彌
違

本里解軍十四

軍人長解舊于本縣二百一十六里排年內輸
差近者一名遠者二三名稽查往牒四十年未
得一週且路遠者費至三四十金公病其不均

又以費有多少全因路之遠近非雜用有不同也乃議令本里之人管解本里之軍其投銷倒號到衛使費不拘遠近給銀六兩每百里則另給路費三錢于通縣排年挨次每名出銀五錢以爲催貼親徵親給不委佐領徵給之數仍置冊填註于是勞佚適均

革社倉長十五

社倉一十七所每年于糧長內僉社長一十七名房科不無需索科派又委官稽查倉穀益增

騷擾公議革去社長各就附近處選誠實老人
一名管之每年算應耗穀若干准與扣除民既
免社長之役而公政清令肅老人無敢雀鼠其
間公家亦利

革預備倉斗級十六

預備倉原編斗級二名包賠折耗吏胥復索使
用查盤時復遭罪罟公革去斗級議申一考吏
看管准作實歷吏願而民悅之

特僉老人代解十七

本縣解役裁革畧盡歸併官解惟神宮監等六
解物非輕齋數亦不少雖有官典守至其批文
投銷掛號不可乏人特議僉老人一名代官投
批掣批年給工食六兩費省事濟蓋公政事無
不精絕而于役法尤精大抵因催役之意而善
用之于役者高賢鴻名者非無一二皆未及
大祛其弊至是旬民之困于役者極矣公至乃
悉更張之豈所謂物極而反時如有待者耶

催民充驛役迎送十八

龍潭水馬驛離縣七十里。凡上司使客經過差役。前迎綠路寫遠。往往遲誤。其未到者。守候經旬。衆甚苦之。公念彼地有附近貧民。可以充役。迎送乃命本驛隨時催募。每月記名報縣。將各正役工食扣給。供應無誤。而貧民藉以資生。爲政善。因有管仲王茂弘之意焉。

安馬戶十九

雲亭驛路當孔道。往來至衆馬夫工食。向不依期解給。又奉差人役。需索折乾小馬等項。馬戶

苦之、或告退、或逃竄。公議設木牌一面、上註馬戶姓名、遇有公差到驛、隨令執牌送縣、硃筆挨次點撥、而嚴絕其折乾等弊。工食按季當堂給散、公差奉法、馬戶安業、刻榜定規、至今便之。

處置社穀二十

社穀原積一萬一百五十五石零、俱貧民貸食、逋有年矣、名爲全追、實全失之、而徒爲書胥索詐地、公分別稽查、其見在陰鑑疇等所欠六千七百七十三石、應追完納、其逃故曹良玉等所

欠三千三百八十二石。申豁蠲免。民免拖累。而公家亦收過半焉。春夏之交。青黃不接。米價騰涌。公每至時。卽將在倉現穀六千餘石。減價糴賣。至十月。仍糴歸倉。官無所費。小民蒙恤。穀以長新。

比徵二十一

追徵折色。向因該書同守櫃糧長結算送比。因緣爲奸。將多改少。致拖不完。公每鄉置條折簿。一挨。一箇逐甲。隨其多寡。匀分十限。明註某限該

完若干。每月一比。完者實填簿內。不煩書役開報。完及數徑聽歸農。不及數者赴比。仍罰一限。復不遵者量責。以故民知勸懲。敲朴不用。依期完納。

禁革兌頭二十二

徵收法等親自較准押識。納戶自兌封投掌櫃。不許粘手。有一人違犯。摘發問徒。仍置銅鑼一面。懸于櫃蓬。有指勒者鳴鑼稟究。自是奸弊寢息。

革兌糧使用二十三

開倉則祭神。開兌則較斛。舊例各量糧長出費。
區頭及書房因而科派糧衡書手門子亦從而
需索公徑支官銀差吏買辦。于是官吏知公實
恤糧長無一人敢索絲毫。此以德風人不煩禁
制刑威而積蠹頓消者也。又舊例倉夫每斛米
五十石索斛手米一大斗其斗三倍于常及兌
完又索飯米掃倉米至是悉革去又倉場逼近
水次每擔米一石給腳夫米一升半路猶揩添

錢公立嚴禁罪坐夫頭更示糧長照依派定軍旗從首齒至尾挨次交兌倉夫歇家不許哄誘糧長買求旗甲先兌官吏軍民胥畏而悅之

定納戶上糧規則二十四

往時倉夫但遇納戶上米每石索蓆米一尖升約有一升五合既以自肥又爲斛糧淋尖榜樣公令各糧長每倉殿門首畫一灰圈製布被一條凡納戶到彼將被攤墊圈內兩平交斛不用蘆蓆納戶親手行槧糧長不得跌斛淋尖倉夫

不許粘手、其自役光棍亦不許以把守倉門爲名索要樣米、違者以攬擾倉場論罪、衆皆拱服、攤減田稅二十五

本縣自丈量後每有墾地爲田、辟山爲地者、聽之則賦不均、加賦則不可公、乃清查約增田一千餘畝、地五百餘畝、均攤合邑稅糧、惟求利民、不欲加稅以表能也

鹽法二十六

本縣鹽行經紀原於瀕河秤發官鹽、近因射利

者私開行場不於鹽所平秤坐勒牙用以致各商每包扣短觔數鋪戶因之擡價發賣公廉知遣人捕獲鹽車當堂秤驗責出前情復瀕河發賣舊規鹽價遂定民得平買又溧陽溧水高淳句容四縣官鹽俱運至本縣河口登岸改包轉運各縣發賣向來混積民房亦無識記三縣鹽商呂省脚價攬越私賣以致本縣鹽觔阻滯公議令三縣鹽堆放官倉本縣鹽觔貸民居及改包則溧陽三十觔用陽字白印溧水高淳各五

十勦。用。水。字。黑。印。高。字。藍。印。本。縣。路。近。七。十五。
勦。句。字。紅。印。分。別。明。白。不。得。影。射。混。賣。又。本。縣。
引。額。鹽。少。價。貴。故。民。趨。賤。買。食。私。鹽。公。請。每。引。
加。入。十。勦。鹽。遂。無。滯。私。販。自。止。寬。民。而。實。利。官。

修學二十七

學宮傾圮日久。公至卽動支官銀二百餘兩。剏
建一新。又本縣原有督學察院十四府遺才畢
來赴考。邇因督撫駐劄調考。太平士心不便。督
學京兆合議。將書院改建。公悉心經畫。平買民

家基地充拓改造應時而就士既知感民亦忘勞又學院按臨考試搭蓋蓬厰常年委用非人頗有溪壑公精審物價皆給見銀置買一竹一木不以取民督工者惴惴奉法故工易就而民不累真才任事真心恤民大抵如此

會課二十八

儒學諸生每月令該學會課三期送卷披閱慮士苦于擣食不能垂久將公堂房租銀二十五兩盡捐爲饔飧費仍立案爲永規

社學鄉約二十九

在城社學原有五所俱已頽廢公修葺樹額東
日居仁西日錄義南日執禮北日沉智中日篤
信聽隣近士民子弟居之選教讀五人訓之各
鄉村無社學者就各鄉約所修飭一如社學例
嚴城守三十

城池關係至重公逐門添設更鼓每鋪增置銅
鑼令按更傳遞更籌鳴鑼擊鼓雖風雨深夜間
出親臨點視更製鋒利器械以備不虞江防信

地無不嚴飭

禁婦女行遊三十一

句容習俗三春有燒香元宵有穿燈幻妄有無爲之教又有婦女遊春名曰踏青公嚴出禁約犯者罪坐夫男雖豪右不貸民風遂變

禁節令供送三十二

舊俗遇迎春日勾攝坊鄉戲夥置辦春筵端午供送紗帳銀符角黍元宵巧裝花燈粉靨并諸節令餽送俱糧里科欽百姓以奉邑大夫公頤

示禁免士紳間有所餽亦不受東郊土牛令人
擇至儀門以禮致祭而已雖金吾不禁之夜士
女寂然而蒲觴艾虎僅存虛名此至性不好繁
華之所感也公惟風句民惟草

教民紡織三十三

吳下風俗大戶小民皆勤紡織獨本縣婦人嬉
怠成習布縷皆易于外境以故日益貧公多方
勸諭發于至誠間出署中所織以示式于是郊
邑之間機杼之聲札札焉布衣布衾小民漸足

自給矣。蓋民風最難變者婦女而公能使通邑婦女變惰爲勤。功效切實。意思深長。前此未有也。

安香客三十四

茅山香客遠來進香者。地棍開張店肆。彊逼飯宿。轎夫驅脚。彊逼騎坐。稍不順從。輒聚衆喧毆。乘機擄掠。公嚴行示禁。犯者輕則杖。重則徒。彊梁寢息。人知嘉惠。遠人不知。乃以善吾民。

畱心養濟三十五

收養孤貧王相等招撫流民趙世良等時臨養濟院存問月米柴薪布疋依時給俵每曰此輩而猶有人侵漁其間或後期致困人卽無可奈何天亦戮之矣奸猾感公之惻隱而畏公嚴明

療民疾三十六

夏秋之交民染瘧痢諸疾貧者不能延醫公每歲捐俸市藥設局于崇明寺日輪醫生數人施劑其篤遠不獲躬致者又命醫生何如海等三十二人分投十六鄉救療活人無數

恤罪人三十七

狴犴之設以懲奸宄第頑民偶觸法網而桎梏終身公外嚴內慈心頗矜之時加存卹疾則召醫診視冬月特設煖匣賞以衣絮仁心益然溢於法外

重耕牛之禁三十八

禁宰耕牛律有濶意嗜利之徒屢犯不顧公痛加懲究不少姑息間有倒斂告官驗明掩埋

興復水利三十九

本縣原有斯善等圩五十一處黃堰等壩一十六座鄒陂等塘一千三十五口公不憚煩勞皆親詣踏勘設法修濬令居民照田起夫修築堅固雖值旱澇有備無虞

輿梁成四十

赤山湖係衆水所歸水勢洶湧而麻培橋正其發洩之處頻年傾壞徽寧池太安廣往來官府客商無不苦之間有徒涉而沒者公廉知捐俸數十金命附近居民趙邦文等督工修造仍聽

勸諭義民輸貲贊成其事

簡飭公館器具四十一

往時各公館公用器具從不完備每於當鋪及富民借用損壞侵匿交還原物時或需索使用害不可言公議以修理家伙銀置造牀帳棹椅盆桶錫器等項一切完整大刊板榜責令門役與守公意與守不專久必損缺損缺必復借之民間然但設冊籍付門役器具總數不能昭彰耳。目。惟。刊。刊。榜。上。可。使。客。經。過。者。獨。目。

了。知本縣經畫周詳必簡飭其羣下而其下
覩此規制亦自寢不肖之心庶令典守易于爲
力無日損日缺復擾民間之患矣蓋聞公七歲
失依危心淡慮自幼習成及居官每處一事莫
不有德慧術知令人可思焉以上治句遺蹟四
十一條終

獨行記

先公嗜好甚輕得於天性官職家業澹如也在
仕路三十年從不開一言出一札求人是以陞
遷必過期得地必勞且遠甲寅年六十一矣赴

建昌道任因部憑重誤一道兩官于時惟按院
明析事宜知誤在銓部勸公赴上川南道且云
舊例此道兼制建昌糧儲故有建昌銜部憑稍
有脫畧耳非一道二官也其義甚辨可從而方
伯與撫院皆憤憤世情中人復書不明所以顧
皆以權理守道爲詞若憐萬里之遠行曲爲調
護者公不樂也堅辭再三大旨謂建昌勞而危
守道逸而安遷就權蒞是避危而就安舍勞而
卽逸也自便其身豈臣誼哉況監司何官紀綱

所存豈敢權理若待題改則動經旬月羈寓
旅館節旄委頓體統之謂何所以始焉遠赴不
敢畏難今焉遄歸庶幾知恥覲顏就列拙性不
能又上疏出揭意皆類此以外臺論銓曹數十
年來未有也遂東還是時吏垣解公經雅兵垣
張公銓皆重公直公疏糾銓曹之誤當事者上
書請罪而意益以不懌竟覆公疏致仕公怡然
閱歲復有四川劉公者新入銓部首推公總閩
憲尋報可雖不及泄任公議不泯焉公生前出

處之迹未明、未幾明矣、不及見、然明于心者、固不待明于天下而後信也。

以坦直了生死

先公忠信豈弟然人不能欺亦不敢犯蓋質性于中行最近而尤異者病篤臨歿之際乙卯九月初病背疽有內外二醫士皆庸手也而內科素受先公恩屢保萬全先公不疑已而勢危自知爲其所誤矣十月望笑而言曰高生真癡漢疽宜作疽醫奈何欲純任內而舍外科耶今已

至此不可治矣。絕無悲恨色。比明呼我母及予
兄弟偕詣牀前。坦然而逝。不爲悽愴一語。雖終
身叅悟。欲了生死者。臨化未必能及。平生嘗云。
吾得力惟坦衷直腸。嗚呼。斯殆坦直之極致迄。
無一毫纏縛迂迴者也。

木梳匣

先慈年十七歸先公。于時風俗淳朴。彼此皆士
庶家。吾年五六歲見吾母有木梳匣一方。蓋奩
具也。中有小黑角梳一枚。嗣後屢膺封典。而自

一冠一袍一束之外。終不增設一綺服華器。此匣與梳。初攜至魏。再攜至句容。又攜至南都。又攜至楚。又攜至蜀。仍攜歸家。年六十九而終。今供靈座者。猶然此匣與梳也。子孫勿忘此意。且宜數數向婦人道之。然又有說焉。婦德之儉。或因養福。或以佐君子之廉。或以垂子孫意。皆至美。然猶有爲也。性與儉安。廉華不適。則無爲而爲。儉出於自然者也。德有以不察爲至。行有以無意爲神。禮男子二十可以衣裘帛。余兄弟十

八九時，寸寸皆布。吾母亦不知禮之當如是也。
率性而中禮。

遵袁職方書札

德業相勸過失相規。數十年前朋友往來尚存此誼。近日交遊酬酢都是套詞諛語。無一毫意思其尤無識者。甚至以呼盧醉。挾技淫謔供筆底之恢諧。襯簡端之風月。以爲相知相親極矣。士夫率先如此。安望市井衆庶不以譖浪笑傲爲常。曾記先公治句時表了凡職方以書貽。

曰我輩平日辛勤刻苦爲子孫創業者死來皆用不着所可待以瞑目而釋然無憾惟此修德行義之事而已大抵生來之福有限積來之福無窮如命中有福十分今日受用一分前面止有九分又受一分前面止有八分隨受隨銷此衆人聽命于天者也吾輩當淡繹積善餘慶之說實爲趨吉避凶之事密密修持孳孳方便則受福一分便可積福十分矣袁酷佛信氏福田之說其云積福意專在建殿齋僧其家每歲餘

種遍給各寺僧衆不足則多方囑托以濟之先
公弗是也然書詞勤懇有德業相勸之意先公
稱服而身體之蒞民治事廉明平恕遠近稱慕
殆亦聽言取友之助焉頃有先達從遠方寄書
訊余余以居高易於修福答書勸勉大旨畧如
哀加以委婉未及所謂死來用不着之語而先
達已大駭謂人曰吾老矣後生乃教訓我耶則
予之進言未得爲智然子路喜聞過遑問告者
何人衛武公年九十有五猶懇懇求警于國當

時臣民何處尋百來歲者而教誡之此公蓋諛詞套語習見習聞乍得規勸之言不覺駭異而不樂也天下無賤不可以教貴無愚不可以教智無少不可以教老進言者當自量當量人受言者惟其言之可從而已矣其人何必問

困學全得父師之力

吾十一二歲時性喜仙佛時時言欲學長生又或言欲作和尚大人時治句一日偶聞之怒甚然不加譴責但自恨曰吾爲人無德居官多罪

致生此兒可奈何且日兒爲此言不過避讀書耳嘆息竟日余惶駭不敢復言十四學時藝下筆頗殊遂自喜不朽之業在是矣研究者數年復分餘力爲詩文莫不輒然自喜也廿六七乃有志經濟搜剔史籍然未有真得試旣屢蹶三十餘失怙境遇益苦乃猛然自恨向來舉動乖張全繇不學之故痛自懲創剪除習氣雖性命未有眞見事不循理者知所戒矣三十七八吳師與梁溪先生同在京邸朝夕相晤覺向來自

善文章經濟之意。均屬可恥。則吳師提醒爲多。四十餘復謁梁溪先生于其家。有所聞而尊之。遂曉夜思之學之。而至今彷彿也。微二先生。吾幾乎困而不學者夫。

去自喜之病

自喜者。學之淺病。能疑者。學之進機。自喜者。矜之根。但矜發於外。較自喜更淺更陋。吾自審生平。得力全在能疑。受病全在自喜。少時留意詩文。則自喜詩文中年考訂經濟。則自喜經濟。四

十歲來乃有志求道。見得着落在人倫。關鍵在存誠。推行在愛人。隨處體貼。因性善思。善疑。疑而深思。多所會悟。又卽以會悟自喜。則是日日學道。日日有獵心。安得謂篤志乎。今宜力祛此陋習。未得是饑。已得是飽。飽則相安而已。自喜何爲。況隨時有會。皆是支流。若有一日原本豁然。未知更如何光景。想當身子無安處。口舌無說處。或者喜不可言。然與自喜之心不同也。庚午清明前五日病起記。

庚午清明前五日病起記

柱聯

萬曆庚申築新第朴素渾堅無一毫雕彩而大門之右有古榆高峙榜云惟喬障水宜存故一素成居畧遠時有革而因同而異之微意焉前堂曰抑抑取抑抑威儀之義也柱聯云人前屋漏日裏鷄鳴有張姓者年八十餘見之曰此聯似頗用往哲語願聞其義曰向人只此不愧之心則顯微庶幾漸一白日總此爲善之意則晝夜可以不分老人爲之點首中堂曰潔梁前柱

聰云達人當結未然之軫小事亦爲無窮之禍後云每思于物有濟恒愧爲人所容祠堂云先聲欲著從幽積餘慶無形耐久看書齋則有伐檀之所前柱聰云一生三事一事收心一事慎行一事守口一日三分一分應物一分靜坐一分讀書蓋言動爲樞機其操在心故一本四勿可以言三事也半日靜坐半日讀書朱子指燕居出外之日在職處家酬應不免隨處皆學也不得不三分之後云勤謀往蹟如經手緩就新

書免誤人。峰臨座則云凌虛結座千塵俯累級。
登峰始願堅。左軒則云內省近覩僅伴躬行先。
對兒曹。內室則云早起晏眠便是興家粗本領。
出言舉步。從來教子實工夫。又云一瞬餘清虞。
過隙五更微夢候初鳴庖厨則云清流在右憑。
收旣濟之功溫火在中能劑不同之味其外臨。
水之處名曰浣徑則云春日遲遲惜陰弄景都。
相許原泉混混激濁揚清也自然池上別齋則。
云近市與聞物息隣農想見躬耕上句用躡貴。

屢賤故事，下句用諸葛南陽意思，一實一虛。

丙寅夏書扇

無所痛苦是身之福。更添娛暢病必隨之。不招一事是家之福。駢見誇耀禍必乘之。

又

長防病患羸者之福。悠然自適。涉或隨之。長遜一分塞者之福。頗求平等。吝或乘之。

余書前語竟日忽病臥絕粒二日乃知是常人情事余未應自許也病起復書此

戒揆兒

謂揆曰吾向也好揚人之善不能掩人之過自喜與子貢同病無傷也四十乃大悔之今汝專疑人惡則心彌刺矣斬稱人善則口彌刺矣行之不悔非人也久而後悔何如夙戒哉

書畧兒扇

畧兒年十二以扇請書問如何是孝弟曰父母言語逐句遵依兄弟姊妹從不爭鬧此名孝弟孝弟之人自然合家歡喜問如何是惜福曰人愛惜不輕怒罵物物愛惜不忍破壞此名惜人愛惜不輕怒罵物物愛惜不忍破壞此名惜

福惜福之人。自然壽命延長。問如何是勤學。曰。
讀書時節不帶白相。白相時節常帶讀書。此名
勤學。勤學之人。自然科名易就。

書從子似木扇

體察於人。偷覺得意氣。不除親疎。皆扞格私心。
或存語動。皆乖舛。有失不得。不得不反求。有覺不得。
不克去。久之客氣漸消。我相漸少。終成一太虛。
爲體之人。懸想乎太虛。獨處一榻。欣然自負。有
見也。及至一人對面。已動好勝。一事到手。思占。

便宜。久之。惟務責物。全忘反躬。形骸嗜慾。盤據而爲之主。終成一極多渣滓之人。大抵真心學道。心與事。打作一片。掛名求道。心與事。分開兩截。

書從子日大扇

晏安酰毒不可懷也。明智尊優。猶用爲戒。何況資適中人。位居蹇蹇者乎。昔溫公言。學問莫如誠。劉元城請問其要。曰。自不妄語。始今吾且卑言之。治舉業治家業。皆莫如勤。有要焉。自不晏。

起始若令歲歲晏安無異日日飲酈嘻有毒而
其之如飴人必喫之我特不聞耳紅日高眠畢
竟何味悠閒筦算了當此生念之令人長太息。
日大自此遂早起可謂能改過閒之甚甚附志之

第四姪臨字日大說

古八元之初季曰大臨臨大也人奚自大幹蠱
而後大天下之蠱無窮而能幹則皆歸父母非
沉默志士孰與幾此吾觀臨也訥於口而志不
其下人其將使若父之世日大以無負命名之

初乎才非必殊高惟勤則進智非必殊慧惟虛則通不勤不虛雖高且慧者猶將失之也若父命名以臨汝思義以蠱

祖塋記

祖塋二一在胥五區東律字圩地名橫涇橋其西北卽舊居相去數十武主穴爲始祖悅民府君名惠妣蔡氏先大夫高祖也悅民父相傳自臨安來然名字墳墓俱無可考故以悅民爲始祖昭穴爲南山府君名芬悅民第三子妣潘氏

先大夫曾祖也皆南向其穆穴及主穴之四隅族人爭葬混淆已甚其地爲坎局頗平厚一在舊居東南二里許名西南閨字圩其湖東卽香和菴主穴西疇府君名鑾南山長子妣丘氏壽九十六乃卒先大夫祖也昭穴爲先大夫生母贈宜人盛氏蓋未三十而夭先大夫纔七齡耳相墓者謂此穴甚貴因葬之後二十餘年而吾祖封郎中雙橋府君乃歿久未葬又二十餘年而繼祖母錢氏棄世遂合葬于穆穴因堪輿家

謂昭穴久安不可復動遂以夫婦分昭穆權也皆南向

安葬先公夢

己巳八月初二日安葬先公訖默禱曰向者每葬得惡夢丁巳初葬則夢先公怒形于色時予兄猶在惶怖同請罪先公曰汝等猶未知耶癸亥冬啟穴則地風吸吸寒氣如冰乃遷葬復五年則夢先公披綠紗衣而泣予驚問故曰我遍身壞矣與汝觀之因去綠衣臂及胸腰皆現膚

層層作枯白色而上觸如白燭燼之四邊悲夫悲夫此予所以皇皇而再遷也今三葬矣覺山川風日若有歡于先靈果爾祈賜一吉夢以慰次夜歸舟則夢先人欲築室數間命予曰惟某僧最有巧思我欲令結構予唯唯顧見墻牆上皆楷書諦視皆五七言詩詞及古文也牆旁三和土尺許字亦滿其上三和土之外則山中原土也字亦滿其上見一人北向當棺而立手持一尺印棺面硃漆上點畫之痕粲然凡四行每

行四句每句約六七字其初行至末二字卽云
第一次行末二字云第二又次行末二字云第
三末行之末二字云第四而末句微斜向右予嫌之
令其人改正其人應曰待漆上字痕稍平我爲
改正之恍然而寤思巧僧結構殆謂築廬山邊
擇人守望也楷書印棺未之能悟然視前兩葬
時意象胥壞矣靈其安與

擬葬先慈夢

庚午五月初八夜夢先公偕袁了凡先生同遊

山上顧余曰聞汝爲父母尋山地安葬甚善我特請了凡覆視登歷良久色咲倍常還下山指足所踐曰形家謂此有真穴汝弗信之是也復以手指前山曰汝所擬穴乃真穴秀獻於前靈環於後余唯唯復請大人觀天馬山大人亦唯唯然不卽去夢中覺大人意此已成之業不必覆觀余遂不固請也寤而念所擬葬母地余意定於餘杭天柱峯北形家意定於杭州白鶴峯東而余所定先一月則以時言之爲前山也杭

在嘉善西南而天柱峯又在杭西南五十餘里以地言之亦爲前山先是占天柱山地得升卦白鶴峰地得歸妹之九二吉凶迥然踰旬復示此夢雖古之夢協于卜不是過矣記以彰先公之靈

拜先公墓歸途

寒食前抵天馬山祭掃先公墓畢自六橋歸過武康一遊桃花滿山與翠竹相間陸行乘輿野意盈目水行乘筏則兩岸綠色挿天清流出於

足底手檠小蓋用蔽日影俯視水中鬚眉畢列
每數十丈溪輒作一大灣筏從溪轉前後不相
見歌聲遙聞時時有圓奇石突出溪旁或亦在
中央艤筏而登可以晏坐談笑無一遊人豪客
來溷耳目廻想西湖六橋水光山色空翠澄恬
宜晴宜雨妙絕天下總爲畫舫綠樓歌舞謳絲管
染成盛麗雖復徜徉山水之間轉有與靜心隔
者乃不如此地朴野虛寥足以滌除塵網

拜先慈墓往來紀勝

自天馬而西水行至餘杭復陸行二十里洞霄故址在望所謂天下名山也遂登北山拜掃先慈墓竟仰對天柱峰頂尖如立面平如削長松竒然下則萬樹參差竹蔭交搖亦有桃花幾株點映綠叢裏雨則衆水淙淙流入墓前小池從池轉右遶背而去鏘鏘琅琅晴則龜蛇二小山對伏墓前左龜隱右蛇顯天柱一峰傍擁兩翼形家指爲飛鶴殆亦近似蓋因龜蛇舊名新悟朝山之爲鶴也日光燦然三靈臚列子弟悅惺

遂躋洞霄。拜紫陽夫子像。一喜。一嘆。羹清泉。剝
鮮筍。傾蘿中所攜飯共餐之。迤邐出山。見戶口。
九鎖山雄奇旋繞。或爲日月。或爲旌鼓。猛獸數
里之外。始復平行。又遠山突出。當戶攔截。遂循
南湖之濱。憇東嶽行祠。橋底怪石交錯。曲挿可
攀。可坐。不可名像。南湖風景大類西湖。亦有六
橋。蜿蜒如虹。橫獨無樓館。一人一舟。邈不可
得。中央土山宛然。諸峰環之。水光浩淼。遠樹鳥
啼響。出雲外。從遊者或爲勝境。興寂寥之感。然。

此名山蓄潤之區幽光潔氣與山靈相表裏千
百載以來專發逸異士而龜山曾父母之紫
陽曾提舉之今得收其正垣集其菁華未必無
兩先生者產焉其不發洩於歌舞繁華特名山
之大快而何寂寥之感之與有西湖盛麗靡曼
爲都會爲貨財南湖類之而不同雖人情所趨
亦地脉司之也歲時修謁墟墓往來于斯領玩
不厭覺有西湖之勝兼武康山川之幽文人學
人隨所懷來竝宜洗發

生氣可見

葬乘生氣蓋生人可得而試目可得而見也先宜人之葬天柱峯北山初平穴塲則來脉了然約濶三尺淺則難計其脉有石有土石具四色紅紫黃綠土亦如之餘旁則純黃土耳無細石脉界其中亦無各異色以是知來脉已真及掘擴纔深一尺則石片鱗鱗以鋤起之皆嫩軟而溫知氣之所聚也再深數寸余手摩其土皆大溫時初寒修兒赤脚下探之立久則足底愈煖

尤異者、脉自艮來、擴坐艮兼丑、擴中獨東北角、
煖氣尤盛、以足近之、脰以上皆熱、蓋生氣非第
自下而上、且從東北而沖西南、其西北東南二
角、則煖氣稍微益信、艮氣之真切矣、此無論福
陰、且比化者受此佳氣于人心、獨無妙乎、葬乘
生氣、絕非渺茫、吾日親覩吾體、親嘗景純、開卷
厥亦大良君子、或有取爾、慰孝思于無疆、

評靖質處士自祭文後

世稱自祭起于陶翁、不知情往日悲回風亦靈、

均之自祭也。陶翁與世無戀。山阿同體。屈子閔宗國之必蹙。憤懣極哀。其歸于至性。則一揆焉。吾兄貽痛老母。切于宗國。灑焉長逝。輕于解綬。其文亦怨亦安。返乎天籟。亦其性也。與亦其學也。與。

又

澹兮容與。泊乎消搖。臨死有一毫沾蒂。悽愴道此八字不出。

評貞婦賦

死事易撫孤難貞臣貞婦千載一心其徘徊不忍死之意惟真不畏死者能知之兄臨死不懼向令事主必爲貞臣故寫貞婦之心如見

又

苦志之濟猶或既顛不幸中之不幸也中河之輩是也姚母有文翁爲之父素懷見諒不幸中之幸也忠臣抗節殺身則不慮是成仁之際女子常蹈其難丈夫多愧其易何哉

又

夫不逮養其親故以發婦兼供子職潔孝之意
固常相通居官不受錢臨難不惜死義亦猶此

又

婦人倚賴在子幼恐難養長更望成曲盡婦人
之情尤盡寡婦之情尤盡貞靜有識者之情

又

析計則度日如年統計則十年瞬息貞婦不能
自寫者皆代寫之

又

事姑則兼爲子。教子則兼父與師。始信貞婦之
生真難于死。真勝于死。

評傷天賦

文情與悼李夫人頡頏。彼愛慾而此天性。愛慾
而能忘。則達也。非薄也。天性而不能忘。則厚也。
非溺也。古今文集侈矣。每于悼亾之篇。可以徵
人。

評曹操劉裕論

二人真千載奇才。殆唐太宗之流亞也。使操以

天下歸漢裕以天下歸晉則與汾陽同稱純臣而功畧過之遠矣操之子孫先滅于孫劉而裕亦再傳而絕較純臣之長世鴻名者果孰爲得哉

評昭烈不取劉琮論

昭烈雖崇信義要與伊孔心事稍殊蓋行一不義殺一不幸而興復漢室昭烈爲之孔明亦贊成之矣取璋不取琮皆因時勢非義重于琮而見利於璋使其君臣復生當謂知已

評武侯論

武侯尚節制。卽以極變化者遇之。當無所施。武侯收變化于節制。非僅有其節制。而不能變化也。如王良。千載神御。止曰。範我馳驅。

評南北論

總錄人才不同。故北常取南。南亦可以取北。而取天下與復天下。又不同。則千秋所未發也。

評李忠定論

弇州以厭理學。故力排宋臣。雖經綸如伯紀。亦

吹求之此云誅邦昌以決戰則伯紀固妙于用
權而非獨正誼之說矣弇州自不悟伯紀意惜
不令讀此文

評張浚論

魏公終身不主和惟此一節守正後籍乃嗣幹
蠱遂見稱于大儒得此論正其罪案且殺曲端
親知岳侯神算而怒令自廢誤宋最深後世當
國者毋徒以守正自多而失良才誤人主也

評元論

劉敬倡和親時也勢也董生不曉以高帝猶然
何況繼統遂主和爲御虜之長策真暗事之儒
也故爲中華百世之辱者敬開之董生成之唐
不得已用之而辱及其內治也絕之而威和莫
甚于宋禍莫慘于宋嗚呼百世可以鑒矣

評錢武肅王宗譜序

余亦嘗序錢譜兄序詳王之世余序闡王之意
既又思之當五代割據其自守也最完且久宋
祖一出而效順先焉向令當五代而倚于人則

子孫必夷。遇宋祖而不臣。則子孫必滅。自雄於五代。而臣於宋。所以爲武肅也。所以爲武肅之子孫也。自守以生民。效順亦以生民。生民之功普矣。至今蕃昌。非天所酬。其孰能當此者乎。

評家藏書總序

可得善藏者之苦心。可砭漫藏者之銬疾。近世多笑棄書爲俗。不知收書庸遂免俗乎。目不識丁。身不行道。出金帛易載籍。自謂清流載籍。蠹於笥。與金帛死於橐。果當何異。

評庚申過糴記

兄每云性懶經濟讀此記知其心熱民生當其言之自謂不惜國武子之禍後之嗣民牧者虛心平覽豈皆齊人

幾亭外書卷三

終